

**SPOROVI** Treći pokušaj prodaje objekta „BH Pošte“

# Čija je atraktivna lokacija u Neumu

Dobili smo odluke nadležnih sudova, koji su potvrdili da je nekretnina u vlasništvu „BH Pošte“, kaže Buza • Šta kažu nasljednici graditelja ribarske zadruge

Nakon što je dva puta propao pokušaj prodaje Poštanskog odmarališta u Neumu, Agencija za privatizaciju u FBiH ponovo je objavila javni poziv za prodaju. Ovog puta, atraktivna nekretnina uz samu jadransku obalu procijenjena je na 1.859.340 KM, što je za skoro 200.000 KM manje od ranije ponude.

## Visoka cijena

Da će i treći put biti dosta problema, govori činjenica da je u međuvremenu Općinski sud u Čapljini obustavio uspostavu zemljišnoknjižnog uloška za tu parcelu, jer na nju pravo polaže više vlasnika. S jedne strane između sebe se spore „BH Pošta“ i „Hrvatske telekomunikacije“, a s druge su graditelji privatne ribarske zadruge, odnosno njihovi nasljednici.


- Nije nam jasno zbog čega je Agencija prošli put poništila poziv. Prigovora je bilo, a mi smo dobili odluke nadležnih sudova, koji su potvrdili da je nekretnina u vlasništvu „BH Pošte“. Iz Agencije su nas



**Neum: Nekretnina uz samo morskou obalu procijenjena na 1.859.340 KM**

obavijestili da prodaja prvi put nije uspjela jer nije bilo dovoljno zainteresiranih, a drugi put možda je i cijena bila visoka, pa smo je ovog puta snizili i odlučili da prodaja ide neposrednom pogodbom – kazao nam je Hajrudin Buza iz „BH Pošte“.

Priznaje da prodaju usporava i nekoliko osoba iz Neuma koje tvrde da su nasljednici graditelja objekta.



**Faksimil Rješenja Općinskog suda u Čapljini**

- U međuvremenu, sve su žalbe odbijene i Agencija je ponovo objavila poziv. Teško je reći šta će na kraju biti, jer je objekt u ruševnom stanju. Zbog toga nas pred početak svake turističke sezone zovu iz Općine Neum i traže da ga saniramo – dodao je Buza.

## Nećemo odustati

S druge strane, Nikša Čamo iz Neuma tvrdi da je

jedan od 17 vlasnika kojima je nekretnina bespravno oduzeta.

- Odmaralište je ranije bilo ribarska zadruga koji je u procesu nacionalizacije prisvojila tadašnja država. Sve dok se ne donese zakon o restituciji, nema prodaje. Da imamo pravo na vlasništvo, saznali smo prije četiri godine i nećemo odustati – rekao nam jučer Čamo.

**F. MUSTAFIĆ**

## Plombirane parcele

- I sada je u javnom pozivu navedeno da su parcele plombirane. To znači da je zaprimljen prijedlog i da se zahtijeva provedba upisa novih vlasnika. Pitam se kako će neko onda napraviti kupoprodajni

ugovor. To je nemoguće. Nije tačno da je cijena prva dva puta bila visoka, jer se radi o najatraktivnijoj lokaciji u strogom centru Neuma. Problem su neriješeni imovinsko-pravni odnosi – rekao je Čamo.

Objavljen konkurs za idejno rješenje obilježja

# Dunović: Prvi put čujem za spomenik na Kazanima

Konkurs Udruženja za društvena istraživanja i komunikacije otvoren do 28. februara

Udruženje za društvena istraživanja i komunikacije objavilo je nagradni konkurs za dostavu idejnih rješenja za spomenik žrtvama ubijenim na Kazanima, a koji bi zapravo bio spomenik svim žrtvama u BiH i postavljen u gradu Sarajevu.

Potpredsjednik Federacije BiH Milan Dunović, koji je u nekoliko navrata

posjetio Kazane i ukazivao na potrebu obilježavanja ovog stratišta, kazao nam je jučer da prvi put čuje i za konkurs i za ideju o spomeniku.

Godine 2011. tadašnji potpredsjednik FBiH iz re-



**DUNOVIĆ:**  
Novac će se naći

da srpskog naroda Sveztozar Pudarić uputio je Gradskoj upravi inicijativu za gradnju spomen-obilježja na Kazanima, mjesta zločina nad građanima Sarajeva, mahom srpske nacionalnosti, te je

za tu namjenu Gradu Sarajevu prebacio 5.000 KM.

- Godinama ništa nisu uradili, niti se znalo šta je s tim novcem.

Prema nekim informacijama, predviđen je ove godine u budžetu. Ako nedostaje novca, može se naći. Pitanje je samo imaju li namjeru da ga naprave – dodao je Dunović.

**M. R. S.**

## Komentar dana

Piše: **Fadil MANDAL**



# Ljevičarski car je go

Nikšić, Komšić i Kojović trebaju svojim biračima objasniti zašto za zrno federalne i državne vlasti planiraju prodati njihove glasove

Izjava Fahrudina Radončića da SBB radije ide u opoziciju nego da bude dio priče o odlasku Bh. bloka u zagrljaj Bakiru Izetbegoviću, ima efekt snijega na kojem će svako od aktera razgovora o formiranju vlasti ostaviti vidljiv trag.

Niko ne bi trebao biti iznenađen Radončićevom odlukom. I prije izbora i u izbornoj noći i nakon izbora on je jasno govorio o nemogućnosti koaliciranja SBB-a s Izetbegovićevom SDA. Prvi je rekao da je BiH potreban blok probosanskih stranaka koje će zemlju izvući iz feudalne moćvare korumpirane vlasti pet familija i snažno okrenuti euroatlantskim integracijama, EU i NATO-u.

Nermin Nikšić, Željko Komšić i Predrag Kojović u početku su zagovarali sličnu politiku, ali, za razliku od Radončića, očito s figom u džepu.

Stranke ljevice, SDP, DF i Naša stranka, sada su izvučene na čistinu. Priča o vlasti bez SDA, njihovim sevepom, mogla bi se raspršiti kao balon od sapunice. Doduše, na kantonalnom nivou to je uspjelo u Sarajevskom i Unsko-sanskom kantonu. Dakle, tamo gdje glavnu riječ nisu

vodili ni SDP, ni DF. U Tuzli i Zenici, gdje je SDP bio lokomotiva, voz se nije mrdnuo s polazne stanice.

Naravno, na Nikšiću, Komšiću i Kojoviću je da svojim biračima objasne zašto za zrno federalne i državne vlasti planiraju prodati njihove glasove i šta se to u međuvremenu promijenilo pa je Izetbegovićeva pružena ruka, za koju ugledni SDP-ovac Zukan Helez kaže da je i korumpirana i kriminalna, sada čista i prihvatljiva.

Nikšić, sudeći prema njegovoj izjavi da je „ugrožen NATO put BiH“ i da je „izrazito ozbiljna politička situacija“, već konstruira providan alibi za prvorazrednu političku izdaju, jer, makar u Federaciji BiH, ne postoji nijedna ozbiljna stranka ni političar koji su protiv NATO-a. Dapače, svi odreda podržavaju takav put BiH.

Hoće li Nikšić, Komšić i Kojović javnosti ponuditi neko drugo objašnjenje za svoj politički salto mortale, ostaje da se vidi. Uglavnom, smokvin list s jeftinim mirisom „brige za državu“ sigurno im neće pomoći da pokriju istinu da je ljevičarski car go i da ipak želi sjesti u krilo SDA.

3



osobe su poginule, a sedam ih je nestalo nakon što je lavina pogodila planinski prolaz na Himalajima u dijelu Kašmira koji je pod kontrolom Indije, rekli su zvaničnici.

**SUBOTA, 19. 1. 2019.**

